

COMISIÓN INFORMATIVA ESPECIAL DE CONTAS E DE FACENDA E ECONOMÍA

ACTA da mencionada comisión informativa, correspondente ao día **22 de xaneiro de 2020**

Na sala de xuntas do Pazo Provincial da Deputación de Ourense, ás 17.45 horas do día 22 de xaneiro de 2020, reúnese a comisión informativa Especial de Contas e de Facenda e Economía coa asistencia dos seguintes deputados e deputadas:

Presidente: D. José Miguel Caride Domínguez, **deputado de Democracia Ourensana**

Deputados/as do Grupo Popular:

D. Rosendo Luís Fernández Fernández

D. Plácido Álvarez Dobaño

D. Álvaro José Fernández López

D.^a Consuelo Vispo Seara

D. Miguel Antonio Cid Álvarez

Deputados/as do Grupo Socialista:

D. Aurentino Alonso Araújo

D.^a Elvira Lama Fernández

D.^a Rosario Rodríguez Delgado

Deputado do BNG: D. Bernardo Varela López

Deputada de Ciudadanos-Partido de la Ciudadanía: D.^a Montserrat Lama Nóvoa

Secretario: D. Juan Marquina Fuentes

Interventor: D. José Mosquera Casero

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á ORDINARIA DO DÍA 11 DE DECEMBRO DE 2019.-

Pola Secretaría Xeral deuse traslado do borrador da acta anterior, correspondente á ordinaria do día 11 de decembro de 2019.

Non se producen intervencións e por unanimidade a comisión adopta o seguinte acordo:

Aprobar a acta da sesión ordinaria da Comisión Informativa Especial de Contas e de Facenda e Economía do día 11 de decembro de 2019, conforme co borrador elaborado pola Secretaría Xeral.

2º.- DELEGACIÓN DO CONCELLO DE CENLLE NA DEPUTACIÓN PROVINCIAL DO EXERCICIO DAS COMPETENCIAS DE RECADACIÓN EN VÍA EXECUTIVA DOS GASTOS DERIVADOS DE EXECUCIÓNS FORZOSAS DOS ARTIGOS 99 E 100 DA LEI 39/2015, DO 1 DE OUTUBRO, DO PROCEDEMENTO ADMINISTRATIVO COMÚN DAS ADMINISTRACIÓNS PÚBLICAS.-

O Sr. secretario expón o contido da proposta.

Non se producen intervencións e por unanimidade a comisión ditamina favorablemente a adopción, por parte do Pleno do seguinte acordo:

Aceptar a delegación de competencias efectuada polo Concello de Cenlle a favor da Deputación Provincial, mediante acordo plenario de data 18 de decembro de 2019, para a recadación executiva dos gastos derivados de execucións forzosas dos artigos 99 e 100 da Lei 39/2015, do 1 de outubro, do procedemento administrativo común das administracións públicas, nas condicións recollidas no acordo de delegación do Concello de Cenlle, sendo en todo caso de aplicación as seguintes condicións xerais:

- a) O contido da delegación abranguerá o exercicio de todas as facultades necesarias para a realización da recadación en vía executiva, ditando todos os actos administrativos necesarios para a xestión dos ditos procedementos, incluída a emisión da providencia de constrinximento e resolución dos recursos administrativos contra os actos de recadación executiva.
- b) Para o exercicio da competencia delegada o concello debería remitir as oportunas certificacións de descuberto do tributo ao que se refire.
- c) A taxa para satisfacer polo concello pola prestación do servizo de recadación en período executivo será o 100% da recarga de constrinximento que debe pagar o debedor tributario conforme co establecido no artigo 6, apartado b) da Ordenanza

fiscal reguladora da taxa pola prestación dos servizos de xestión, inspección e recadación da Deputación Provincial de Ourense. A Deputación deducirá da transferencia do importe recadado a cantidade correspondente á taxa liquidada, sen prexuízo da notificación da dita liquidación na forma prevista no artigo 9 da Ordenanza fiscal.

- d) A presente delegación estará vixente a partir do día seguinte ao da súa publicación no Boletín Oficial da Provincia durante un prazo de catro anos, prorrogándose tacitamente por períodos de 4 anos se ningunha das partes mostra expresamente a súa vontade en contra, comunicándollo á outra cunha antelación non inferior a 6 meses á data sinalada ou á de calquera dos períodos de prórroga.

3º.- MODIFICACIÓN DOS CRÉDITOS ORZAMENTARIOS DO ORZAMENTO DO EXERCICIO 2020 MEDIANTE A CONCESIÓN DE CRÉDITO EXTRAORDINARIO N.º 1/2020.

O Sr. interventor expón o contido da proposta que supón a consignación de crédito para un préstamo participativo a MEISA por importe de 332.770,98 €.

D.ª Montserrat Lama Nóvoa, portavoz de Ciudadanos-Partido de la Ciudadanía, sinala que ano tras ano a Deputación Provincial non deixa de investir diñeiro en MEISA e que non se ve unha saída clara ao dito investimento, sinala que o seu grupo obterá máis información para pronunciarse no Pleno.

D. Bernardo Varela López, portavoz do BNG, incide en que se trata dunha sociedade mercantil que non deixa de recibir fondos públicos, que no pasado exercicio se investiron en torno a 4,5 millóns de euros nos canóns de innivición e que o resultado este ano foi desastroso. Engade que debe abordarse con seriedade un estudo sobre o potencial que ten esta estación de montaña e sobre como lle está afectando o imparable cambio climático. Por último aproveita a súa intervención para solicitar que se lle informe por escrito das achegas que se lle fixeron a MEISA nos últimos anos.

D. José Miguel Caride Domínguez, portavoz de Democracia Ourensana, indica que agora mesmo trátase de aprobar o crédito necesario para o préstamo participativo e evitar así a quebra da sociedade, se ben se amosa partidario de que se estude e se debata con tranquilidade sobre o futuro da estación e a súa xestión.

D. Aurentino Alonso Araújo, do Grupo Socialista, aproveita para pedir tamén un informe detallado sobre as contas desta sociedade. Engade que o investimento nos canóns de innivición non tivo ningunha repercusión na estación, recordando que nesta temporada soamente abriron as pistas dous ou tres días, e solicita que por lealdade institucional se revoque a decisión de excluír do Consello de Administración aos representantes dos concellos de Manzaneda e a Pobra de Trives.

D. Plácido Álvarez Dobaño, portavoz do Grupo Popular, toma nota de todas as contribucións que se fan en positivo, incide na necesidade de aprobar agora mesmo o préstamo participativo, sen prexuízo de que se reflexione sobre a viabilidade da estación.

D.^a Montserrat Lama Nóvoa, portavoz de Ciudadanos-Partido de la Ciudadanía, tamén solicita información sobre as razóns que levaron a excluír do Consello de Administración aos concellos da Pobra de Trives e Manzaneda.

D. Bernardo Varela López, portavoz do BNG, únese á petición da información de Ciudadanos.

D. Aurentino Alonso Araújo, do Grupo Socialista, indica que non se cuestiona o traballo e o investimento realizado ata agora en MEISA pero faise necesaria unha reflexión profunda nela, engade que nela deben participar os concellos afectados.

Non se producen máis intervencións e co voto favorable de Grupo Popular (5) e de Democracia Ourensana (1) e a abstención do Grupo Socialista (3), do BNG (1) e de Ciudadanos-Partido de la Ciudadanía (1), a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente a modificación de créditos do expediente n.º 1/2020, co seguinte detalle:

Créditos extraordinarios. Gastos de investimentos:

Aplicación	Expresión	Importe
433.00/831.00	Desenvolvemento empresarial. Préstamo a longo prazo	332.770,98 €

Recursos utilizados:

Remanente de Tesourería. Subconcepto 870.00 para financiar gastos	332.770,98 €
---	--------------

xerais	
--------	--

2º.- De acordo co artigo 169 da Lei reguladora das facendas locais, por remisión do artigo 177.2 do mesmo texto legal, o expediente será exposto ao público, tras o anuncio no Boletín Oficial da Provincia, por 15 días, durante os cales os interesados poderán examinalo e presentar reclamacións ante o Pleno.

O expediente considerárase definitivamente aprobado se durante o citado prazo non se presentasen reclamacións.

4º.- MOCIÓN DE URXENCIA.- Non se presentan.

5º.- ROGOS E PREGUNTAS.- Nesta quenda prodúcense as seguintes intervencións:

D.ª Montserrat Lama Nóvoa, portavoz de Ciudadanos-Partido de la Ciudadanía, reitera a petición efectuada sobre os investimentos realizados pola Deputación Provincial en MEISA e as razóns que levaron a excluír do Consello de Administración aos concellos afectados.

D. Plácido Álvarez Dobaño, portavoz do Grupo Popular, di que se pedirá a información e se lle facilitará.

E, ás 18.10 horas, dáse por finalizada a reunión, redactándose a presente acta que se asinará electronicamente. Dou fe.